

Bangunkan Palestin menerusi wakaf infrastruktur

**MOHD.
ASHROF
ZAKI YAAKOB**

SEJARAH dunia sekali lagi dipahat dengan kebiasaan entiti haram Yahudi Zionis menindas Palestin dengan kezaliman yang melampaui batas kemanusiaan. Negara-negara besar dunia pula masih membutakan mata dan memekakkan telinga daripada melihat kesengsaraan rakyat Palestin yang terus menerusi ditindas dan dizalimi di hadapan mata.

Sejumlah 15,000 korban nyawa yang melayang masih belum mampu mengetuk hati nurani kemanusiaan pemimpin-pemimpin dunia untuk menghalang kekejaman ini daripada terus berleluasa. 10,000 daripada mangsa yang terkorban ialah wanita dan kanak-kanak, namun tiada sekulim rasa simpati wujud di dalam hati mereka.

Dengan kekuatan umat Islam yang mencapai 1.9 billion dan merupakan agama kedua paling ramai pengikut di dunia, pastinya tindakan yang bersifat solidariti bersama akan memberikan impak kepada Israel, sekutunya dan seluruh dunia.

Terkini, selepas lanjutan gencatan senjata berjaya menghentikan sementara pengeboman di Gaza, persoalan mula timbul mengenai nasib rakyat Palestin selepas dibenarkan pulang ke kediaman mereka. Dalam lebih 50 hari serangan berterusan, tentera Israel mengubah sebahagian besar landskap negara Palestin dengan seluruh kawasan perumahan bertukar menjadi runtuh. Natijahnya, kemasuhan lebih 500 bandar dan kampung di Palestin oleh tentera Israel hingga menyebabkan lebih 700,000 warga Palestin menjadi pelarian.

Umat Islam seluruh dunia perluri bersedia dan berusaha sedaya mungkin membantu membangunkan kembali Palestin seperti sedia-kala. Wakaf infrastruktur daripada



DENGAN kekuatan umat Islam yang mencapai 1.9 billion dan merupakan agama kedua paling ramai pengikut di dunia, pastinya tindakan yang bersifat solidariti bersama akan memberikan impak kepada Israel, sekutunya dan seluruh dunia.

seluruh negara Islam merupakan penyelesaian terbaik membantu kembali Palestin untuk bangkit semula.

Wakaf infrastruktur ialah suatu konsep pembangunan harta wakaf yang memfokuskan kepada pembinaan infrastruktur bagi memenuhi keperluan dan pembangunan masyarakat, semata-mata kerana Allah SWT. Sumber pembangunan wakaf infrastruktur boleh diperoleh sama ada secara konvensional iaitu melalui harta tak alih (al-'aqar) seperti tanah dan bangunan, ataupun melalui wakaf tunai yang diturarkan menjadi harta tak alih yang bermanfaat dan wujud secara nyata. Dalam konteks pembangunan semula Palestin, dana sumbangan negara-negara Islam adalah sumber utama yang perlu difokuskan.

KEPERLUAN UTAMA

Asas wakaf infrastruktur adalah berdasarkan hadis sahith iaitu jawapan Rasulullah SAW kepada 'Umar al-Khattab RA apabila baginda ditanya tentang apa yang perlu dilakukan kepada

tanah milik 'Umar al-Khattab RA di Khaybar. Baginda SAW bersabda: "Tahanlah pokoknya dan bersedekahlah dengannya (jaitu manfaatnya)". Berdasarkan sabda Rasulullah SAW ini, para ulama menyatakan bahawa ia merupakan konsep asas kepada pelaksanaan ibadah wakaf iaitu, pertama, tahbis al-asl iaitu menahan pokok atau asas harta (daripada rosak atau musnah), dan kedua; tasbih al-thamarah iaitu menyularkan buah atau manfaat harta kepada penerima wakaf.

Dalam pelaksanaan wakaf infrastruktur, ia perlu menepati konsep asas yang telah dinyatakan iaitu pemeliharaan pokok atau asas harta daripada rosak atau musnah, dan penyuruh manfaat harta wakaf secara terus kepada penerima wakaf. Bagi memastikan konsep ini dapat dilaksanakan, pelaksanaan wakaf infrastruktur perlu dirancang dengan teliti dan mengambil kira semua aspek berkaitan iaitu, pertama, tahbis al-asl (pemeliharaan asas harta) iaitu pemilihan kaedah dan jenis pembangunan. Kaedah

pembangunan harta wakaf mestilah mengambil kira kriteria pematuhan syarak sepenuhnya (aqad dan proses) dalam pelaksanaan projek, manakala jenis pembangunan terbaik ialah pembinaan infrastruktur berdasarkan keutamaan semasa dan setempat, dengan kegunaan manfaat yang menyeluruh. Dalam konteks Palestin, analisis segera perlu dilaksanakan bagi menyenaraikan keperluan utama yang perlu disegerakan pembinaannya.

Seterusnya, mekanisme pengawalan harta daripada rosak atau musnah iaitu setiap projek pembangunan yang dijalankan perlu mengambil kira aspek pengawalan daripada kerosakan dan tempoh ketahanan agar manfaat dapat diperoleh untuk tempoh masa yang panjang. Segala risiko kerosakan dan kemasuhan dalam pembangunan harta wakaf perlu dinilai dan diambil kira semasa proses pelaksanaan pembangunan tersebut. Di Palestin, pastinya ada risiko kemasuhan semula harta yang diwakafkan namun ia tidak menjadi

persoalan utama kerana keperluan utama Masyarakat Islam perlu disegerakan.

Kedua, tasbih al-thamarah (penyaluran manfaat harta) iaitu sasaran penerima manfaat. Penentuan sasaran penerima manfaat amat perlu dilakukan sebelum sesuatu projek pembangunan harta wakaf dijalankan. Sasaran penerima manfaat yang tepat akan memaksimumkan kegunaan sesuatu harta wakaf, mengelakkan pembaziran sumber dan meluaskan penyebaran manfaat kepada segenap lapisan masyarakat. Bagi pembangunan wakaf infrastruktur di Palestin, keutamaan perlu diberikan kepada keperluan wanita dan kanak-kanak agar kebajikan mereka terbaik.

Seterusnya, jenis manfaat ditentukan berdasarkan sasaran penerima manfaat. Ia juga akan mempengaruhi jenis pembangunan yang dipilih dalam membangunkan sebuah harta wakaf. Bagi pembangunan wakaf infrastruktur, secara asasnya terdapat empat bidang pembangunan yang perlu diutamakan iaitu:

Pertama, keagamaan seperti masjid, tanah perkuburan, pusat zakat, baitulmal dan sebagainya. Kedua, pendidikan seperti sekolah, institusi pengajian tinggi, perpustakaan dan sebagainya. Ketiga, kesihatan seperti klinik dan hospital, pusat dialisis, makmal sains perubatan dan sebagainya, dan keempat, kemudahan sosial seperti taman rekreasi dan permainan, pusat sukan, pusat sehat awam (one stop centre), pusat kebudayaan, balai raya, dewan orang ramai dan sebagainya. Dalam konteks pembangunan semula Palestin, keperluan utama ialah pada penginapan dan tempat tinggal yang telah musnah semuanya, maka keutamaan boleh diberikan kepada pembinaan semula rumah-rumah penduduk yang terjejas akibat perperangan ini.

PROFESOR MADYA DR. MOHD. ASHROF ZAKI YAAKOB ialah Pengarah Bahagian Zakat, Sedekah & Wakaf, Universiti Teknologi Mara (UiTM).